

Graenzgaenger



Fasnacht 2019

Dr FCB: Champion in dr Sandwich-League

Wotsch als Frau bim FCB schutte,
muesch Lööslü verkaufe und Sandwich schputte!

Sieh-en-en, dä US Sänder,
brichted live us vyyle Länder.
Vo Basel kunnt do maischtens nyt!
Gits bi uns nyt ? Oder hänn si kai Zyt?
Bi uns gits Eskalazione,
wo sich e Reportasch wurd lohne!
Nimm s Trämli, d Musee, d Mäss Basel im Leid!
Unsri Kulturstadt stoht vyl z vyl offside!

Do bringt aini ihr Buschi ins Parlamänt,
und wird usegshiggt vom Presidänt.
Drby isch s Niveau im Grosse Root
eso, dass es au e Buschi verstooht!
Und vo dr SVP, wo soo gärn Drugg macht,
drugge vier dr falsch Abschtimmigs-Knopf – Politik guet Nacht!!

Mit Gäld will ain d Hörner vo Rindviecher schitze.
D Bürger vo Basel dien das unterstizte!
Au In heechere Kraiss blibt alles bim alte:
Männer mien Hörner subventionslos bhalte

Mit dr BaZ foot e neyi Komeedi a,
si gheert jetz dr Zircher Tamedia!
Kunnt s Läggerli-Huus ächt au unter s Mässer,
und bacht z Ziri „Läckk-Tirggel“ fir die Allesfrässer?

Im Spital isch dr Käfer e Risiko.
D` Immun-Resischtänz syg nimmi do.
Au d Mäss Basel verliert rapid an Substanz!
Isch s dert au dr Käfer oder schlicht Arroganz?
Es isch halt wie s isch – kasch s draje wie S wotsch:
Hyt trait me APPLE, nimm Hayek - du Dotsch!

In Dytschland hänn d Jurische Rabbatz,
wäge stark vermueterer Mensche-Hatz.
In Basel wär so e Knatsch fir d Katz:
mir erläbe das täglich uf em Bahnhofplatz!

No dr „No Billag“ – Schlacht drajt gly,
SRF siibe e „No Fake“-Serie.
Bi de Lüüt vo Mäss, BVB und meh....
Au Partei-Presidänte ka me gseh!
Dr Titel haisst „Hader im Kader“ (Profilneurose!).
S isch nit zem luege, und scho gar nit zem lose!!

Und pletzlich isch z Basel doch ebbis bassiert,
wo CNN und die ganz Wält intressiert:
„125 Joor FCB“! Das frait aim richtig!
Do isch dr Tabälleblatt nimmi so wichtig!

Drfir git s e tolls Jubiläums-Ässe!
Und das wird für d Medie e „gfunde Frässe“,
well dr Nobel- Club zum Fescht-Bankett
si Fraue-Mannschaft nit yglaade hett!
Si derfe de Gescht aber Lösli verkaufe,
und griege e Sandwich, als Dangg firs Laufe!

Wotsch wisse, wär was brichted het?
Gang go luege im Internet:

<https://edition.cnn.com/2018/11/22/football/fc-basel-anniversary-gala-womens-team-tombola-tickets-spt-intl/index.html>
<https://www.20min.ch/schweiz/basel/story/Der-FC-Basel-schafft-es-bis-in-die-News-von-CNN-28739505>
<https://www.tagesanzeiger.ch/sport/fussball/fcb-demuetigt-sein-frauenteam/>

E Froog an Vorstand, ganz im Vertraue:
Sin Fraue bim FCB nit FCB-Fraue??
Si schutte doch wie d Männer au,
und ergere sich au rot und blau!
Bewirggt e Sandwich zwische de Zeen,
dass si s anderi Gool vyl besser gseen?

Männer im „Sandwich“ tien gestikuliere,
wenn si, yglemmt vom Gegner, d Balle verliere.
Es fählt halt an Technik, Stil und Sprutz!
Im Kopf isch nit d Taktik, sondern dr Stutz!
D Unpässligkaits-Lische wird als wie voller,
Vyl hän die schwarz Gäälsucht, die maischte e Koller!
Do hilfts au nit, wenn si vor em dusche,
ihri kontaminierte Liibli usstusche!
Au dr Steller nit, wo erkläart was nit glingt,
und immer die glyche Ussreede bringt!

Dr Menuplan isch bim FCB wichtig!
Wär Falsches isst, dä kickt nit richtig!
Gilt das au fir dr Presidänt,
und sy yglemmts Temperamänt?

D UEFA will d Liga ney strukturiere,
und sich an dr Verpfläggig vome Club orientiere.
Do e Ygglemmts laischtigsfördernd syg,
spilt dr FCB, mit de Fraue, in dr <Sandwich-League> !

*Vom Määntig znacht bis am Mittwoch demoorge kasch
uff em Minschterplatz und em Kasärnen-Areal d'Ladärne-
d'Waagen- und Requisiyten-Uustellig go aaluege!*

*Kumm doch au in unsere Glygge-Käller
an dr Theaterstrooss 20*

www.graenzgaenger.ch

Druggerey Runser Druck & Satz AG, Basel